

POAHSOAN EN KOSONNED

EN

WEIN SOKEHS

1985

"POAHSOAN EN KOSONNED EN WEIN SOKEHS"

KALOHKEPEN POAHSOAN EN KOSONNED WET

KITAIL ARAMAS AKAN EN WEIN SOKEHS (PWAHPWAHLIK) ME AHNGEHR  
MANAMAN LAP ME KAUNO (KOHT) KETKIONG KITAILIER, MANAMAN,  
PWUHNG OH PWUKOAH EN PEIN KAKAUN, APWAPWALI, KAUKAWEID  
OH SINSILE SAHPW, DEKE, SEHD, NAN WEHWE, OH AUDEPE KAN  
KOAROS. KITAIL KAWADAHR POAHSOAN EN KOSONNED WET PWEHN  
KATENGEHDI ONG ARAMAS EN WEIN SOKEHS MANAMAN LAP WET.  
KITAIL KASALEHDAHR NI SOHPEIKASAL, ME ATAIL KEHL OH LINGAN  
POAHSSOANDA SANG NI EHU PENEHN SOANGESOANGEN ARAMAS,  
TIAHK, MAHSEN, LAMALAM, OH ATAIL MEN DOADOAHKPENE OH  
MINIMINPENE PWEHN KOLOKOL ONG WEHI PAI, MELEILEI OHI POPOHL.  
KITAIL KALOHKIDAHR OH KATENGEHDI SANG NI ENGINKEHILAP,  
MANAMAN UNSEK EN WEIN SOKEHS.

IRE LAUD I  
MANAMAN LAP

Poahsoan en Kosonned wet ih Kosonned me Keieu ile oh Manaman nan wein Sokehs. Ire ieu nan mwekid en government me uhwong Poahsoan en Kosonned wet sohte manaman.

IRE LAUD 2  
WASA ME WEIN SOKEHS KIPE

Ire tikitik I. **Wasa me Wein Sokehs Kipe.** Sahpw oh audepe kan koaros; pwehl oh audepe kan koaros; pihl oh audepe, naniak, mad oh audepe kan koaros; nahmw, madau oh audepe kan koafos; nan wehwe, pan sed oh audepe kan koaros; kohieila mwail 200 sang ni idin pereu likin paina; pahn kepin sed oh audepe kan koaros; iangahki sampei kan ni masloalen paina; deke Pakin (Sampwonopwon), Deke Oruluk, Deke Minto de Minto Reef; oh iangahki mad oh deke koaros me pahn pwarada nan irair en wasa me wein Sokehs kipe.

A. Irepen Sokehs oh Nett tepida pohn wasa ileile ni pali Eir en Nahna Dolen Kiepw, wasa me kedierekda ni pali Epeng, meter 71,850 oh pali Mese meter 79,230 me sansal ni mehn sosohng me kedierekda sang mehn doadoahk en sosohng en wein Pohnpei (Grid System); uhla ni pali Epeng en pali Mese ni 22' 23' 45" ni meter 1,538; uhla ni pali Epeng en pali Kapi 00' 28' 18" ni meter 2,430; uhla ni pali Epeng en pali Kapi ni 23' 08' 13" ni meter 3,665; ulahng ni pali Epeng en pali Mese ni 29' 39' 00" ni meter 748; uhla ni pali Epeng en pali Mese ni 16' 06' 48" ni meter 468; uhla pali Epeng en pali Mese ni 00' 46' 27" ni meter 740; uhla ni pali Epeng en pali Mese ni 51' 20' 25" ni meter 384; uhla ni pali Epeng en pali Mese ni 06' 20' 25" ni meter 384; uhla ni pali Epeng en pali Kapi ni 18' 48' 48" ni meter 496; uhla ni pali Epeng en pali Kapi ni 39' 33' 35" ni meter 597; uhla ni pali Epeng en pali Kapi ni 08' 42' 41" ni meter 1,254; uhla ni pali Epeng en pali Kapi ni 15' 59' 45" ni meter 1,560; oh uhla maslikin paina ni pali Epeng ni mwail riepwiki (200) de meter sillopw-rienen-kid-welipwiki-weneisek-duwau (321,869).

B. Irepen wein Sokehs oh wein Kitti tepida pohn wasa ileile ni pali Eir en Nahna Dolen Kiepw, wasa me kedierekda ni pali Epeng meter 71,850 oh pali Mese meter 79,320 me sansal nan mehn sosohng me kedierekda sang mehn doadoahk en sosohng en wein Pohnpei (Grid System); uhla ni pali Eir en pali Kapi ni 83' 36' 04" ni meter 1,077; uhla ni pali Epeng en pali Kapi ni 62' 14' 29" ni meter 664; uhla ni pali Epeng en pali Kapi ni 85' 55' 53" ni meter 2,396; uhla ni pali Eir en pali Kapi ni 79' 32' 19" ni meter 2,891; uhla ni pali Eir en pali Mese ni 04' 35' 01" ni meter 2,378; uhla ni pali Kapi maslikin paina ni mwail riepwiki (200) de meter sillopw-rienen-kid-welipwiki-weneisek duwau (321,869)

### IRE LAUD 3

#### TOWE MEHLEL

Ire tikitik 1. **Towe Mehlel.**

A. Aramas emen me ni ah ipwidi, emen rehn ah Pahpa de Nohno wia towe mehlel de pwilidak en weipokon en Pohnpei oh pil wia towe mehlel en wein Sokehs ni ahnsou me Poahsoan en Kosonned wet kamanamanla, wia tohn wehi mehlel en wein Sokehs.

B. Aramas emen me wia towe mehlel en wehi de mware kilikilel nan pwuhk en eden tohn usuhs en wein Sokehs mwohn kamanamanlahn Poahsoan en Kosonned wet, wia towe mehlel en wein Sokehs.

Ire tikitik 2. **Wiepen Wiala De Sohla Wia Towe Mehlel.** Pwihn en Kawada Kosonned pahn koasoanehdi weipen wiahla de sohla wia towe mehlel en wein Sokehs.

### IRE LAUD 4

#### KALOHKEPEN PWUHNG

Ire tikitik 1. **Lokaia oh Nting.** Pwungin aramas en lokaia, nting oh kak en kasalehda ire sohte lipilpil ieu ni saledek oh pwuhng en ale de pil rong ni pwungin kosonned, audepen ire kan koaros, sohte pahn pehdsang.

Ire tikitik 2. **Pwungin Towehda Ehu Lamalam.** Emen emen aramas ahneki pwuhng oh manaman en towehda pelien lamalam oh iang soangen kaudek me pein ih inengieng.

Ire tikitik 3. **Pwuhng Pahrek.** Sohte kosonned de mwekid ehū en government kak irehdi pwuhng pahrek en aramas akan, pwehki arail wia ohl de lih, wia kadaudok en wasakis, arail pelien lamalam. lokaia de arail lapalap de tikitik, aramas koaros ahneki perehre pahrek.

Ire tikitik 4. **Saledek en Kapokon oh Kasalehda Nsen.** Sohte Kosonned de kemwekid ehū kak irehdi aramas en kak kapokon de kasalehda nsen ni onepek mwahu.

Ire tikitik 5. **Doadoahngki Pwungin Kosonned.** En aramas eh mour, salekek de dipwisou sohte kak pehdsang likin wiepen me koasoandi sang kosonned.

Ire tikitik 6. **Kosonned me mene Pwurala Mwuri oh Kalokolok Likin Koasoandi en Mwoalen Kopwung.** Sohte aramas emen pahn dipaniki eh wiewia eh mahs me ni kosonned sohte wia dihp ni ahnsouo. Kalaudlahn kalokolok en dihp ehu sohte kak en doadoahk ong dihp kan me wiawi mwohn kalaudlao. Sohte aramas emen kak kedierekda me e dipaniki dihp ehu de ale kalokepe likin koasoandi en Mwoalen Kopwung me koasoandi sang kosonned.

Ire tikitik 7. **Ropirop de Pehdda.** Pwuhng me aramas anehki me silehdi paliwararail oh arail dipwisou kan sang mwekid soh konehng en ropirop oh pehdda sohte pahn ohla. Sohte kisin likoun mweidada ropirop de alahldahn mehn kadehde kak wiawi, ihte ma mie kahrepe mwahu me kadehdepe wiawihda pahn menen kahula oh kisin likoun ropirop wet kawehwehda ni dehde wasa me ropirop pahn wiawie oh aramas de dipwisou kan me pahn alahlda.

Ire tikitik 8. **Pwuhng me Mehn Pahnkadip Ahneki.** Nan mwekid en kadipadip koaros, mehn pahnkadip dihp ehu lao e dedehda sang Mwoalen Kopwung me e dipaniki. Mehn pahnkadip pahn mwadangete ese mour oh kahrepen kadip, e pahn ahneki pwungin ale sounsawas, ahneki pwungin kopwung ni ahnsou mwadang mwohn weipokon, kopwung soh peupoar, ahneki pwungin kilang oh rong sounkadehde kan me uhwong ih, oh en kapeidek ni unsek. E pahn ahneki pwungin pekihda kisin likoun pekipek ong ah mehn kadehde oh sounkadehde, oh e sohte pahn idihdiong en kadehde pein ih. Sohte aramas emen pahn kak mihla pahn kopwung en dihp tohto sang pak ehu ong dihp tehieu.

Ire tikitik 9. **Inapwihdi Selidi Pwehki Pweipwand.** Sohte aramas emen kak selidi pwehki ah sohte kak en pwainla ah pweipwand.

## IRE LAUD 5

### PUNGIN USUHS OH USUHS

Ire tikitik 1. **Kak en Iang Usuhs.** Towe mehlel en wein Sokehs me ni ahnsou en usuhs, e mahkier sounpar eisek-waluh (18), oh sohte dipekihda dihp toutou ehu me kareiong eh mihni pahn kalokepen dihp ni selidi en liki, de selidi en ahnsou, de pahn kalokolok en dihp toutou, kak iang usuhs. Koasoandi teikan ong kak en iang usuhs pahn koasoandi sang kosonned.

Ire tikitik 2. **Kileldien Usuhs oh Wiepen Usuhs.** Kileldien tohn usuhs oh wiepen usuhs pahn koasoandi sang kosonned. Usuhs udahn pahn wiawi ni rir.

Ire tikitik 3. **Usuhs en Chief Magistrate oh Pwihn en Kawada Kosonned.** Usuhs en Chief

Magistrate oh towe kan en Pwihn en Kawada Kosonned pahn kin wiawi rahn tehieu ni Are keriau en sounpwong November nan pahr pahieu (4) koaros.

Ire tikitik 4. **Usuhs Tohrohr oh Usuhs en Repen Kupwur.** Usuhs tohrohr oh usuhs en repen kupwur pahn kin wiawi ni duwen me pahn koasoandi sang kosonned.

## IRE LAUD 6

### PALIEN KAUWADA KOSONNED

Ire tikitik 1. **Manaman en Kawada Kosonned.** Manaman en kawada kosonned mihmi rehn Pwihn en Kawada Kosonned.

Ire tikitik 2. **Lopidi en Usuhs oh Tohtohn Weliepe.** Lopidi en usuhs pahieu (4) pahn mie nan wein Sokehs oh tohtohn weliepe kan pahn poahsoan sang ni tohtohn towe mehlel en ehu ehu lopidi en usuhs. Ehu ehu lopidi en usuhs kan pahn ahneki sohte malaulau sang weliepe men. Koasoansapahl en-tohn weliepe kan pahn kin wiawi nan irair en pahr eisek (10) koaros, mwurin Poahsoan wet e pahn manamanla oh pil kak wiawi mwurin ehu wadawad en tohtohn aramas me manaman. Pwihn en Kawada Kosonned pahn koasoanehdi sang kosonned tohtohn weliepe kan oh ehu ehu lopidi en usuhs.

Ire tikitik 3. **Me Kak en Wia Weliepe.** Sohte me pahn kak iang wia candidate ong nan usuhs en weliepe de idihda ong nan Pwihn en Kawada Kosonned lao e pahn mahkier sounpar rieisek-limau (25) ni ahnsou me ah dien doadoahk pahn tepida, e wiaier tohn wehi manaman en Pohnpei sounpar rieisek (20), wia tohn wein Sokehs sounpar limau (5) oh wiaier tohn lopidi me e pahn usuhs loale sohte mwotomwotasang sounpar ehu (1). Aramas emen me dipekihda dihp toutou sohte kak towehda Pwihn en Kawada Kosonned lao e pahn alehdi mahk me pahn kapwurehiong ah pwuhng, rahn weneisek (60) mwohn usuhs. Pwihn en Kawada Kosonned kelehpw me ahneki manaman en koasoanehdi oh wia soun tenek ong kak en towe kan.

Ire tikitik 4. **Sehr Tehnda Kan.** Ma mie tehnda ehu nan Pwihn en Kawada Kosonned rahn 360 de pil tohtohsang mwohn ehu ahnsoun usuhs, ah lopidio pahn wia usuhs torohr. Ma tehndao mwotomwotasang rahn 360 ah Chief Magistrate pahn idiada emen weliepe pwehn peusehla ahnsou me luwehdi. Weliepe me usuhsda de idihda pahn mwohdedi ni ahnsou me usuhs de idihdao aledier kamanaman sang Pwihn en Kawada Kosonned.

Ire tikitik 5. **Pilpildahn Opsihr Kan oh Koasoandien Doadoahk.** Pwihn en Kawada Kosonned pahn pein pilada ah opsihr kan, wiada koasoandien ah doadoahk oh kilikilele audepen mihting kan koaros.

Sohte usuhs ehu en Pwihn en Kawada Kosonned pahn wiawi ni rir ihte usuhs en ah opsahr kan oh kamanamanlahn opsahr teikan me idihda sang Chief Magistrate.

Ire tikitik 6. **Tiepene Koasoandi oh Tiepene Tohrohr Kan.**

A. Pwihn en Kawada Kosonned pahn tiepene pak pahieu (4) nan ehu pahr. Ahnsoun tiepene oh wen tohtohn rahn en tiepene kan pahn koasoandi sang kosonned.

B. Chief Magistrate kak eker ehu tiepene tohrohr sang ni anahn. Silikis-riau (2/3) en Pwihn en Kawada Kosonned pil kak eker ehu tiepene tohrohr ni soh pohnese sehr tehnda kan. Tohn Pwihn en Kawada Kosonned pahn wie lamalamkihte ire ieu de ire kan me sansal nan kahrepe me eker tiepene tohrohr.

C. Tiepene koasoandi oh tiepene tohrohr kan koaros pahn langada ong weipokon.

Ire tikitik 7. **Quorum.** Pahkis-siluh (3/4) en Pwihn en Kawada Kosonned pahn wia quorum pwehn kak tialahng nan ehu tiepene. Ahpw Pwihn en Kawada Kosonned-ieu me sohte lel quorum kak kakoamoalehdi tiepene kan en ehu ehu rahn oh idingohng wyliepe me sohte iang pwaredo en pwaredo nin duwen me pahn koasoandi nan koasoandi en wiepen doadoahk en Pwihn en Kawada Kosonned en wein Sokehs.

Ire tikitik 8. **Silasil.** Tohn Pwihn en Kawada Kosonned men sohte kak en irairdihsang ah saledek ni ahnsoun ah tiepene kan de ni ahnsou me e kokolahng de pwurupwurasang tiepene oh committee mihting kan. Ihte ma e mihla pahn pakaraun en dihp toutou de kawehla onepek.

Ire tikitik 9. **Manaman en Kadimpak.** Pwihn en kawada Kosonned oh ah committee kan ahneki manaman en wia kedimpak, wia karongorong mwohn weipokon, kihda pehkiek en sounkadehde de mehn kadehde oh pil kihda kahula ong sounkadehde kan. Wiepen apwali aramas me kasohwe manaman wet pahn koasoandi sang kosonned.

Ire tikitik 10. **Peiaidahn Pwukoah oh Pweipwei.**

A. Sohte tohn Pwihn en Kawada Kosonned men kak en ale ehu pweipwei de soangen isais sohte lipilpil sang Government en wein Sokehs likin pweinerail.

B. Sohte tohn Pwihn en Kawada Kosonned men kak en idihda ong chu pwukoah doadoahk nan Government en wein Sokehs.

Ire tikitik 11. **Kokoudahn Pwihn Kan.** Board, Commission of Authority kan kak en kokouda sang kosonned.

Ire tikitik 12. **Kamwomwadahn Kosonned oh Pekipek Kan.**

A. Sohte kosonned kak en kokouda likin wiepen kamwomwadahn kosonned.

B. Moangen kamwomwadahn kosonned koaros pahn kin tepkihda mahsen

pwukat, " **E KOKOUDAHR SANG PWIHN EN KAUWADA KOSONNED EN WEIN SOKEHS.**"

C. Pwe kamwomwadahn kosonned ehu en kak wiahla kosonned, e pahn udahnalehdi kamanaman ni wadawad keriau oh wadawad riau pwukat sohte kak en wiawi nan rahn ehu.

D. Kamwomwadahn kosonned koaros me kamanaman sangehr Pwihn en Kawwada Kosonned pahn kin ale kamelel sang Lapalap en Pwihn en Kawwada Kosonned oh kadehde sang soun inting oh e ahpw pahn pekedering Chief Magistrate.

E. Pekipek ehu kak kapidelong ni wiepen kamwomwadahn pekipek ehu oh alehdi kamanaman en pali ngeder en towe kan ni soh pohnese sehr tehnda kan ni rahn me e kapidelong.

Ire tikitik 13. **Kemwekid Ong Kamwomwadahn Kosonned Kan Me Chief Magistrate Sohte Kamana.** Ni en Chief Magistrate ah pahn kapwurehla kamwomwadahn kosonned ehu me e sohte kamana, Pwihn en Kawwada Kosonned kak en pwurehng kamaurada iren kamwomwada wet oh pil pwurehng usuhski. Ma pahkis-siluh (3/4) pwungki, ah kamwomwadahn kosonned wet pahn wialahr kosonned, ni sohte alehdi sain de kamanaman en Chief Magistrate. Wiepen doula pohn soukamanaman en Chief Magistrate kak en wiawi nan tiepene mwurinte sohkamanaman, pak ehute.

#### IRE LAUD 7

#### PALIEN KAKEHLAKA KOSONNED

Ire tikitik 1. **Manaman en Kakehlaka Kosonned.** Manaman en kakehlaka kosonned nan Government en wein Sokehs mihmi rehn Chief Magistrate.

Ire tikitik 2. **Me Kak en Wiahla Chief Magistrate.** Sohte me kak wiahla Chief Magistrate lao e mahkier sounpar silihsek (30) ni ahnsou me ah dien doadoahk pahn tepida, wia tohn wehi mehlel en weipokon en Pohnpei erein sounpar rieksek (20) oh wia tohn wehi mehlel en wein Sokehs sounpar eisek-limau (15). Chief Magistrate men pahn kin usuhsda sang pali moron en tohn usuhs mehlel en wein Sokehs nan usuhs lap ehu en weliepe kan. Aramas emen me dipekihda dihp toutou sohte kak en wiahla Chief Magistrate. Chief Magistrate men sohte kak ale ehu pwukoah tohrohr likin ah pwukoah.

Ire tikitik 3. **Tehndahn Ohpis oh Sohla Kak Doadoahk.** Ni ahnsou me Chief Magistrate sohte pahn mie, ah emen soun doadoahk en nan ohpis en Chief Magistrate pahn weliandi nin duwen me kosonned pahn koasoanehdi. Ma Chief Magistrate mehla, pwilikihdi ah pwukoah, de sohte kak doadoahk nan irair en rahn silipwiki-wencisek (360) de tohtosang mwohn ehu ahnsoun usuhs, ah ehu usuhs tohrohr pahn wiawi pwehn pilada weliepe. Ma rahn me luwehdi ko mwohn ehu ahnsoun usuhs malaulau sang rahn silipwiki-wencisek (360) ah kosonned pahn koasoanehdi wiepen sehr tehndao

Ire tikitik 4. **Koasoandi en Palien Doadoahk Kan.** Koasoandi en doadoahk oh pwukoah kan en Palien Kakehlaka Kosonned pahn koasoandi sang kosonned.



Ire tikitik 5. **Idihdahn Soun Doadoahk Kan.** Soun doadoahk me pahn moange doadoahk kan nan Palien Kakehlaka Kosonned pahn idihdasang Chief Magistrate oh pahn alehdi kaweid oh kamanaman en usuhs "Ei" en pali moron en Pwihn en Kawada Kosonned, ni soh pohnese sehr tehnda kan. Soun doadoahk koaros nan palien Kakehlaka Kosonned me idihda pahn doadoahk pahn manaman en Chief Magistrate.

Ire tikitik 6. **Kemwekid en Chief Magistrate ong Kamwomwadahn Kosonned Kan.** Chief Magistrate ahneki rahn silihsek (30) sang rahn me kamwomwadahn kosonned lelohng nan ah ohpis, en wiaiong wiepen kamanahla de sohte kamanahla kamwomwadao ni unsek. Ma e sohte kamana, e pahn kihda kahrepe kan ni nting oh kapwurelahng Pwihn en Kawada Kosonned. Kamwomwada ieu me sohte kamanamanla oh pil sohte kapwurupwurla nan irair en rahn silihsek (30), pahn manamanla duwehte ma alehdi kamanaman en Chief Magistrate. Chief Magistrate kak en sohte kamana ire ehu de pil totohsang nan kamwomwadahn kosonned en doadoahngki mwohni.

## IRE LAUD 8

### PALIEN KOPWUNG

Ire tikitik 1. **Manaman en Mwolen Kopwung.** Manaman en teneki kopwung mihmi nan Mwolen Kopwung en wein Sokehs oh nan Mwolen Kopwung tikitik kan me pahn kokouda sang kosonned.

A. Mwolen Kopwung en wein Sokehs ahneki manaman en teneki oh koasoanehdi ire koaros nan kopwung en dihp oh pwungkan.

B. Mwolen Kopwung en wein Sokehs ahneki manaman en tenekisapahl kopwung sapahl me pahn kapidelong sang Mwolen Kopwung tikitik kan oh pil ahneki manaman en tehksapahl pwungilahn kopwung nan Mwolen Kopwung tikitik kan me sohte pidada kopwungsapahl, iangahki koasoandi kan en opsir de pwihn kan en Government en wein Sokehs.

C. Mwolen Kopwung en weipokon en Pohnpei ahneki manaman en tenekisapahl kopwungsapahl kan me pahn wiawi sang Mwolen Kopwung en wein Sokehs, oh pil ahneki manaman en tehksapahl pwungilahn kopwung nan Mwolen Kopwung en wein Sokehs me sohte pidada kopwungsapahl.

Ire tikitik 2. **Towe Kan.** Mwolen Kopwung en wein Sokehs pahn audaudkihda Soun Kopwung Keieu men, iangahki ienge me pahn koasoandi sang kosonned, ahpw sohte tohtohsang riemen. Idihdda en Soun Kopwung pahn wiawi sang Chief Magistrate, oh ale kaweid oh kamanaman en usuhs "Ei" en silikis-riau (2/3) en Pwihn en Kawada Kosonned, ni soh pohnese sehr tehnda kan. 3

Ire tikitik 3. **Me Kak Wia Sounkopwung.** Sohte aramas men kak en wia Soun Kopwung lao e mahkier sounpar silihsek-limau (35) oh wiahier towe mehleh en wein Sokehs sohte mwotomwotasang sounpar eisek (10). Aramas emen me dipekihda dihp toutou sohte kak en wiahla Soun Kopwung.

Ire tikitik 4. **Dien Ahnsoun Doadoahk.** Dien ahnsoun doadoahk en Soun Kopwung men pahn mihmi ni sounpar waluh (8).

Ire tikitik 5. **Pwukoahn Soun Kopwung Keieu.** Soun Kopwung Keieu en Mwolen Kopwung en wein Sokehs me ahneki pwukoah oh manaman en kaweid, kakaun doadoahk, koasoanehdi isepen tohn doadoahk kan, mwohni oh dipwisou en palien kopwung. Soun Kopwung Keieu ahneki manaman en kawada wiepen kopwung oh wiepen doadoahk. E ahneki pwukoahn koasoanehdi oh kawada plan en mwohni en palien kopwung me e pahn kin kadarohng Pwihn en Kawada Kosonned, weidiki Chief Magistrate, ni pekipek en mwohni nan mwohni me kapidelong kan oh pahn kin kadarohng Legislature en weipokon en Pohnpei, ni pekipek en mwohni sang nan nahk en mwohni en weipokon en Pohnpei, weidiki Soun Kopwung Keieu en weipokon en Pohnpei. Chief Magistrate oh Soun Kopwung Keieu en Pohnpei sohte kak wekidala plan en mwohni en Mwolen Kopwung en wein Sokehs, likin mweimwei en Soun Kopwung Keieu en Mwoalen Kopwung en wein Sokehs.

Ire tikitik 6. **Pwungilahn Kopwung Kan.** Pwungilahn kopwung kan me Mwoalen Kopwung kan oh Pwihn en Tenek kan pahn koasoanehdi, udahn pahn idawehn ineng en Poahsoan en Kosonned wet, Kosonned teikan en wein Sokehs, oh pohnese tiahk me pahn kolokol wahu, meleilei oh onepek mwhau ong tohn wein Sokehs.

## IRE LAUD 9

### TAXES OH MWOHNI EN WEIPOKON

Ire tikitik 1. **Manaman en Kawada Taxes.** Government en wein Sokehs ahneki manaman en koasoanehdi oh rikada taxes kan oh soangen isais teikan, ongete anahn en weipokon, me sohte irairdihsang ni Poahsoan en Kosonned en wein Pohnpei oh Poahsoan en Kosonned en Kahndeke Kapatapat kan en Micronesia

Ire tikitik 2. **Ohpis en Kanekid en wein Sokehs.** E pahn mie ohpis en Soun Kanekid en wein Sokehs. Ohpis wet oh wiepen ah doadoahk kan pahn koasoandi sang kosonned.

Ire tikitik 3. **Inoun Doadoahngki oh Kapidohi Mwohni.** Inoun dodoahngkihla mwohni oh kapidohi en mwohni sang nan wasahn kanekid en wein Sokehs kak wiawi nin duwen koasoandi en kosonned.

Ire tikitik 4. **Koasoandi en Budget.** Chief Magistrate ahneki pwukoahn kaunopada oh kapidelong ong Pwihn en Kawada Kosonned budget en ohpis kan ong ehu ehu pahr akan, me pahn kasalehda duwen anahn oh kahrepen doadoahklahn mwohni kan, oh soangen kapidelong en mwohni me kesikpe mie, me pahn wia kisehn mwohni me pahn rikirikda nan ehu ehu pahr ong ehu ehu pahr en doadoahk.

Ire tikitik 5. **Doaropwehn Doadoahk en Mwohni en Wehi.** Government en wein Sokehs pahn kolokol oh apwapwali ni keneinei, doaropwe koaros me wia mehn kadehde ong ni mwohni kan me kapidelong oh mwohni kan me kapidohi oh pahn daur nin duwen koasoandi en wiepen pwuken mwohni kan. Dien pwuhk pwukat pahn mihmi ni erein sounpar siluh (3) mwurin petehkpen mwohni kan ah wiawier.

Ire tikitik 6. **Petehkpen Mwohni en Wehi.** Doaropwe koaros me kilelehdi doadoahklahn mwohni en wehi pahn kin mie petehkpe nan pahr riau (2) koaros de kak mwadangasang ni ahnsou me anahnepe pahn

## IRE LAUD 10

### SAHPW

Ire tikitik 1. **Ohpis en Sahpw.** E pahn mie ohpis en sahpw nan wein Sokehs. Koasoandi kan me pid ohpis wet pahn koasoandi sang kosonned.

Ire tikitik 2. **Kemwekid me Pid Sahpw.** Plan, koasoandi oh soangen kemwekid koaros me pahn pidada sapwen weipokon oh wasa teikan nan irair en wasa kan me Sokehs kipe pahn alehdi kamanaman sang ohpis me apwali sapwen wehi.

Ire tikitik 3. **Alaldahn Sahpw.**

A. Government en wein Sokehs ahneki manaman en alehda, pwainda oh kolokol sahpw, ongete kamwahupen wehipokon. Pweipweidahn sahpw pahn menen ire tikitik wet pid sahpw me aramas emen inengieng netikihla. Wiepen alehda oh apwapwali sahpw pahn koasoandi sang kosonned. ?

B. Government en wein Sokehs kak en doadoahngki sapwen aramas ni menen Eminent Domain ongete kamwahupen wehi. Isepen sahpw akan me ohpis alehda sang aramas pahn manaman en ire tikitik wet pahn koasoandi ni isais pwung oh konehng. Wiepen alehda sahpw pahn koasoandi sang kosonned.

Ire tikitik 4. **Epwelpen Pahn.** Sapwen wehi koaros (pahn) pahn mi pahn epwelpen Nanmwarki, Chief Magistrate oh Kaun en Kousapw me Pahn mih loale.

Ire tikitik 5. **Isepen Doadoahngki Sapwen Wehi.** Koasoandi en isepen doadoahngki sapwen wehi pahn koasoandi sang kosonned.

## IRE LAUD 11

### TIAHK

Poahsoan en Kosonned wet pohnese sapwellimen wein Sokehs Mwoalen Wahu oh Tiahk kan.

## IRE LAUD 12

### IRE ORALAP TEIKAN

Ire tikitik 1. **Pesenkaun.** Pesenkaun en wein Sokehs pahn koasoandi sang kosonned. Dipwisou oh sahpw kan me pesenkaun en wein Sokehs pahn doadoahngki pahn mih pahn epwelpen Government en wein Sokehs.

Ire tikitik 2. **Pweinen me Usuhsda, Idi' oh Tohn Doadoahk Teikan.**

A. Pweipwei kan oh isais tohrohr teikan ong tohn ohpis me usuhsda oh me idihdda koaros pahn koasoandi sang kosonned. Pweipwei oh isais tohrohr teikan ong tohn Pwihn en Kawada Kosonned oh Chief Magistrate sohte kak kalaudla nan irair en dien arail doadoahk, ihte nan koasoandi keieu pahn Poahsoan wet me kak. Pweipwei oh isais tohrohr teikan ong tohn ohpis me usuhsda oh idihda kak en katikitikla ahnsou sohte lipilipil, apw katikitikla wet pahn kipehdi tohn ohpis pwukat koaros ni uwe pahrek ieu ong emen emen tohn ohpis pwukat.

B. Koasoansapahl en pweipwei oh isais tohrohr teikan ong tohn ohpis me usuhsda oh idihdda pahn kak wiawi mwurin sounpar limau (5) koaros.

C. Pweipwei ong tohn doadoahk en Government en wein Sokehs likin me usuhsda oh idihdda pahn koasoandi sang kosonned.

Ire tikitik 3. **Wiepen Kapidohi Sang Lapalap Men.** Chief Magistrate oh wɔliepe men nan Pwihn en Kawada Kosonned oh Soun Kopwung men en ohpis en wein Sokehs, kak en lekidekla sang nan ah pwukoah doadoahk, ahpw ongete kahrepe me pahn pid sohte kapwaiada ah pwukoah, wiewia me sohte konehng nan ohpis de sohla kak wia ah pwukoah de dipekihda dihp ehu me pahn kandandsuwediala ohpis

A. Ni alahldahn pekipek ehu me pid lekideklahn Lapalap men en Government, me-aledier usuhs en pahkis-siluh (3/4) en towe kan koaros en Pwihn en Kawada Kosonned, ni eh soh pohnese sehr tehnda kan, pakair pen lekidekla wet pahn, ni nting, wesiklahng Lapalap meno.

B. Ni alahldien pakairo, Lapalap menet pahn koammoaldi sang ah pwukoah kan, ahpw pahn wie pweipwei awiawi pwungilahn karongorong.

C. Mwolen tenek ehu me pahn audaudkihda Soun Kopwung silimen, me pahn iangahki Soun Kopwung en wein Sokehs men, emen pahn idihdda sang Chief Magistrate, oh emen pahn idihdda sang Nanmwarki en wein Sokehs. Aramas idihdda pwukat pahn alehdi kamanaman en Pwihn en Kawada Kosonned. Ma kadip en kamwakidasang pahn uh Wong Chief Magistrate, ah idihdda pahn wiawi sang Lapalap en Pwihn en Kawada Kosonned. Mwolen tenek wet pahn idiada Sounkadip tohrohr men me pahn ale kamanaman en pali moron en tohn Pwihn en Kawada Kosonned, ni soh pohnese sehr tehnda kan. Usuhs en silikis-riau (2/3) en nan Mwolen tenek wet pahn anahn pwehn kak koasoanehdi me soun doadoahk men dipadahr oh pahn lekideksang nan ah pwukoah.

D. Pwungilahn karongorong kan nan Mwolen tenek wet sohte pahn doula likin pwukoah en kapidohi sang lapalap menet nan ah pwukoah, ahpw lapalap me kedierekda me e dipada, pahn kak en mihla pahn kadipadip en dihp, kopwung oh alehdi pwungilahn kopwung me uh Wong ih, oh kalokolok nin duwen koasoandi en kosonned.

E. Koasoandi oh wiepen kakommoalehdi lapalap men sohte pahn reirei sang rahn weneisek (60).

Ire tikitik 4. **Wiepen Kapwurehsang Opsih Usuhsda Men.**

A. Pwehn kapwurehsang Chief Magistrate nan ah pwukoah doadoahk, kisin likoun pekipek ehu pahn sain sang percent pahisek (40%) en irail tohn usuhs me mwarerail kilekilel nan pwuhken usuhs, udahn

pahn pekederiong opsir iie kaun Pwihn en Kawada Kosonned, me pahn ni ahnsouhte idiada soun apwali usuhs tohrohr me pahn ahneki manaman en alehda pwuken usuhs me pwaren tohn usuhs en wein Sokehs kilekilel ie. Nan irair en rahn eisek (10), Soun apwali usuhs tohrohr menet pahn teneki oh kamehlelehda pwungin kisin likou en pekipeko. Ma kisin likou en pekipeko mehleh oh pwung, usuhs en kapwurehsang Chief Magistrate pahn wiawi nan irair en rahn silihsek (30) mwurin kasan-saldahn mehleh oh pwungin pekipeko sang soun apwalih usuhs tohrohr.

Chief Magistrate men pahn kapwurupwursang nan ah pwukoah ma percent limeisek-ehu (51%) en tohn usuhs manaman kan utung pekipeko.

B. Pwehn kapwurehsang weliepe men nan lopidio, kisin likou en pekipek me sain sang percent pahisek (40%) en tohn usuhs kan en lopidio me adarail kilekilel nan pwuken usuhs en wein Sokehs, pahn pekederiong Chief Magistrate pwehn kadauluhl lahng soun apwali usuhs tohrohr. Soun apwalih usuhs tohrohr pahn, nan irair en rahn eisek (10),tehk mehleh oh pwungin pekipeko. Ma pekipeko mehleh oh pwung, usuhs en kapwurehsang weliepeo pahn wiawi nan irair en rahn silihsek (30) mwurin rahn me Soun apwali usuhs tohrohr kasalehda me pekipeko mehleh oh pwung. Weliepe men kak kapwurupwursang nan ohpis ma percent weneisek (60%) en irail tohn usuhs manaman kan me kilekilel nan pwuken usuhs en wein Sokehs en lopidio me weliepeo kohsangie utung en kapwurupwursang.

Ire tikitik 5. **Kosonned en Wiewia Mwahu ong Me Usuhsda, Idihdda oh Tohn Doadoahk Kan.** Tohn Pwihn en Kawada Kosonned pahn koasoanehdi ehu pwuken wiewia mwahu ong me usuhsda, idihdda oh tohn doadoahk en wein Sokehs, duwen arail pahn kapwaiada arail pwukoah ni pwungin kosonned oh wiewia konehng oh mwahu, oh koasoanehiong kalokepe kan.

Ire tikitik 6. **Rahn Lapalap Kan.** Rahn lapalap'akan en wein Sokehs pahn koasoandi sang kosonned.

### IRE LAUD 13

#### WEKIDEKLAHN POAHSOAN

Ire tikitik 1. **Wiepen Wekideklahn Poahsoan en Kosonned Wet.**

A. Pwihn en Kawada Kosonned kak kamwomwehda wekidekla ieu ong Poahsoan en Kosonned wet sang ni eh pahn alehdi silikis-riau (2/3) en usuhs en "Ei" en toweh kan koaros ni soh pohnese sehr tehnda kan. Kamwomwadahn wekidekla wet pahn pekederiong Chief Magistrate oh nan irair en rahn eisek (10) e udahn pahn koasoanehdi rahn ehu me kamwomwadahn wekidekla wet pahn kolahng aramas nan usuhs en repen kupwur ehu, pwe ren kamana de sohte kamana. Chief Magistrate sohte kak en doadoahngki manaman en soukamana iren wekideklao.

B. Wekidekla ieu ong Poahsoan en Kosonned wet kak kamwomwada ni pekipek ehu ni eh pahn pekederiong Chief Magistrate ni nting, me pahn kasalehda ni dehde oh unsek iren wekideklao oh kolokol sain en sohte tikitiksang silikis-ehu (1/3) en aramas me mwarerail kilekilel nan pwuhk en usuhs en wein Sokehs. Chief Magistrate pahn tehk pekipek wet oh nan irair en rahn eisek (10) mwurin eh pekederiong, e pahn kadehdehda me pekipek wet kolokol uwen totohn sain en aramas en usuhs me anahn. Mwurin

kakehr kolahng aramas pwe ren usuhski.

C. Kamwomwadahn wekidekla ieu me sang rehn Pwihn en Kawada Kosonned de pekipek ehu sang aramas akan pahn pid ire teieu.

Ire tikitik 2. **Kamanamanlahn Kamwomwadahn Wekideklao.**

1. Kamwomwadahn wekideklao pahn kolahng aramas akan pwe ren kamana de sohte kamana nan usuhs lap de usuhs tohrohr ehu, me pahn wiawi sohte tohtohsang rahn weneisek (60) mwurin kamwomwadahn wekideklao eh pahn koasoandier oh usuhspe kakehr wiawi.

2. Iren wekidekla ieu me kamwomwadahr pahn manamanla ma e alehdi percent limeisek-ehu (51%) en tohn usuhs.

Ire tikitik 3. **Petehksapahl en Poahsoan en Kosonned Wet.** Nan irair en sounpar eisek (10) koaros, mwurin kamanamanlahn Poahsoan en Kosonned wet, petehksapahl pahn wiawi pwehn tehksapahl iren Poahsoan wet, kaunopada iren wekidekla kan, oh kapwurehlahng aramas pwe ren usuhski. Wiepen apwali doadoahk wet pahn koasoandi sang kosonned.

#### IRE LAUD 14

#### DUWEN DOULAHNG NAN GOVERNMENT KAPW

Ire tikitik 1. **Kosonned Me Kokouda Pahn Menen Municipal Charter.** Kosonned koaros en government pahn menen Municipal Charter me wie manaman ni ahsou me Poahsoan en Kosonned wet manamanla oh sohte uh Wong Poahsoan en Kosonned wet, pahn wie manaman lao menerail pein sohrala, wekidekla, welialihda de kasohrala.

Ire tikitik 2. **Pwuhng Kan en Inou.** Pwukoah oh pwungin inou me wie manaman mwohn Poahsoan wet ah kamanamanla wie manaman lao menerail pein sohrala.

Ire tikitik 3. **Sahpw, Dipwisou oh Pwukoahn Inou Me Alahlda Pahn Menen Municipal Charter.** Government kapw en wein Sokehs, pahn menen Poahsoan en Kosonned wet, pahn ahngedo oh ahnekihla sahpw, dipwisou oh sohng teikan oh pwukoahn inou me Government en wein Sokehs alehda pahn menen Municipal Charter. Dipwisou en government ehu sohte pahn kak en netila de keseuda ma e sohte idawehn koasoandi en kosonned.

Ire tikitik 4. **Soun Doadoahk Keieu Pahn Poahsoan Wet.** Ni ahsou me Poahsoan en Kosonned wet manamanla, Chief Magistrate oh Tohn Pwihn en Kawada Kosonned kan koaros oh arail pwukoah kan pahn koasoandi en Government en Charter, pahn usehla arail doadoahk oh pwukoah kan pahn koasoandi en Poahsoan en Kosonned wet oh wia Soun Doadoahk Keieu en Government en wein Sokehs.

Ire tikitik 5. **Keieu en Koasoansapahl en Tohtohn Weliepe.** Pwihn en Kawada Kosonned, nan erein rahn epwiki-rieisek (120) mwurin kamanamanlahn Poahsoan wet, pahn kawada kosonned me pahn

koasoanehdi lopidi en usuhs oh tohtohr weliepe nan ehu ehu lopidi. Ma anahnepen usuhs tohrohr ehu pahn mie pahn menen ire tikitik wet, ah usuhs tohrohr ehu pahn wiawi, sohte pwandasang rahn silihsek (30) mwurin kamanamanlahn kosonned me kauwada usuhs. Usuhs tohrohr wet pahn ongete audehda sehr kapw me koasoandi nan kosonnedo.

Ire tikitik 6. **Keieu en Usuhs Pahn Menen Poahsoan en Kosonned Wet.** Keieu en usuhs en weliepe kan en tohn Pwihn en Kauwada Kosonned oh Chief Magistrate pahn Poahsoan wet pahn wiawi Niare Keriau en wihk en November 1987.

Ire tikitik 7. **Ahnsou Me Mwolen Kopwung en Wein Sokehs Pahn Menen Poahsoan en Kosonned Wet Pahn Tepida Doadoahk.** Palien Mwolen Kopwung pahn pepeuselahte doadoahk pahn menen Charter oh Judiciary Act en 1982 en wein Pohnpei lao sohng kan me pid koasoandi en wiepen doadoahk oh soangen koasoandi me konehng teikan pahn kaunopada sang rehn Soun Kopwung Keieu en wein Sokehs.

## IRE LAUD 15

### RAHN ME POAHSOAN EN KOSONNED WET PAHN MANAMANLA

Poahsoan en Kosonned wet pahn manamanla ni ahnsou me Chief Magistrate pahn kalohkihda me Poahsoan en Kosonned wet aledier kamanaman en tohn usuhs. Chief Magistrate ahneki, sohte pwandasang rahn eisek (10) mwurin usuhs eh wiawier oh soandier, pwehn kamelelehda me Poahsoan en Kosonned wet aledier kamanaman en tohn usuhs, ninduwen me sansalehr nan usuhs.